

PALAEMON

Dicite, quandoquidem in molli consedimus herba
Et nunc omnis ager, nunc omnis parturit arbos,
Nunc frondent silvae, nunc formosissimus annus.
Incipe, **Ovidi** ; tu deinde sequere, **Tibulle** ;
Tu deinde sequere Virgili.
Alternes dicetis ; amant alterna Camenae.

OVIDIUS

Aurea prima sata est aetas.

TIBULLUS

Quam bene Saturno vivebant rege, priusquam
Tellus in longas est patefacta vias !

OVIDIUS

Nondum caesa suis, peregrinum ut viseret orbem,
Montibus in liquidas pinus descenderat undas,
Nullaque mortales praeter sua litora norant.

TIBULLUS

Nondum caeruleas pinus contempserat undas,
Effusum ventis praebueratque sinum.

VIRGILIUS

Cedet et ipse mari vector, nec nautica pinus
Mutabit merces.

TIBULLUS

Nec vagus ignotis repetens compendia terris
Presserat externa navita merce ratem.

VIRGILIUS

Non rastros patietur humus, non vinea falcem.

OVIDIUS

Ipsa quoque immunis rastroque intacta nec ullis
Saucia vomeribus per se dabat omnia tellus.

VIRGILIUS

Ipsaque tellus
Omnia liberius, nullo poscente, ferebat.

OVIDIUS

Mox etiam fruges tellus inarata ferebat,
Nec renovatus ager gravidis caneat aristis.

VIRGILIUS

Molli paulatim flavescet campus arista.

TIBULLUS

Ipsae mella dabant quercus.

OVIDIUS

Flavaque de viridi stillabant ilice mella.

VIRGILIUS

Durae quercus sudabunt roscida mella.

TIBULLUS

Ultroque ferebant
Obvia securis ubera lactis oves.

VIRGILIUS

Ipsae lacte domum referent distenta capellae
Ubera.

TIBULLUS

Illo non validus subiit juga tempore taurus.

VIRGILIUS

Robustus quoque jam tauris juga solvet arator.

TIBULLUS

Non fixus in agris
Qui regeret certis finibus arva, lapis.

VIRGILIUS

Ne signare quidem aut partiri limite campum
Fas erat.

TIBULLUS

Non acies, non ira fuit, non bella, nec ensem
Immiti saevus duxerat arte faber.

OVIDIUS

Non tuba directi, non acies cornua flexi,
Non galeae, non ensis erat : sine militis usu
Mollia securae peragebant otia gentes.

TIBULLUS

Nunc Jove sub domino caedes et vulnera semper,
Nunc mare, nunc leti mille repente viae.

VIRGILIUS

Alter erit tum Tiphys, et altera quae vehat Argo
Delectos heroas ; erunt etiam altera bella,
Atque iterum ad Trojam magnus mittetur Achilles.

PALAEMON

Non nostrum inter vos tantas componere lites :
Et vitula tu dignus et hic **et hic et quisquis**
Auream aetatem, Saturno rege, canet.
Claudite jam rivos, pueri ; sat prata bibunt.

Tibulle, *Elégies*, I, 3, v 35-50

Virgile, *Bucoliques*, 3, v 55-59 et v 108-111

Virgile, *Bucoliques*, 4, v 18-45

Virgile, *Géorgiques*, I, v 125-142

Ovide, *Les Métamorphoses*, I, v 89-112

Modifications nécessaires en gras

